

吳國禎：Phah 碎 ê 畫布

色水攪好 畫筆 giáh 起來

Siàu 念茫霧 ê 影跡

Beh 用畫布來約束

也 m̄ 甘愈離愈開

淺淺 ê 咖啡 Ûn 一筆飽 tīⁿ

是火車入站 ê 景緻

故事，就 án-ni 開始

筆 bak 畫布，hit 一時

意念斷 kuèh、圖景破 khih

碎糊糊 溢來溢去

Bē 輸 lòn 破花杆 ê gín-á kāng 款

緊 kā 土腳 ê 色水收收 leh

走去愈 kuân ê 所在，giáh 頭

看天地曠闊，山 kuân 草冷風 tsng 骨

畫布 koh 再 thí 開 tsiah 知

舊相片親像舊曲盤

已經 hō 生活 ê 輪轉磨 kah m̄-tsiáⁿ 歌聲